



Rabu, 16 Oktober 2024

Ogen : Perb. Rasul 16:11-15



Geluhku Jadi Pasu-pasu



W Nanamna si kata tuhu, kai pe adi la ernanam labo terakap” belas-belas enda jadi sada penjemba mabai geluh ernanam, mereken ngaruh ku sekelewet. Sekalak Moria, erbinaga kelontong pendahinna. Tapi mereken ngaruh man kalak siedeban. Ia memang labo ngerana, entah ngata-ngatai maka mbelin ngaruhna man kemajun perpulungen bage pe kalak sideban. Iperdiateken pendeta me kegeluhenna, lit piga-piga ngaruh si mereken kiniulin ibahanna. Sipemena, ibabaina me sekalak si labo anggota Moria bengket ku bas PA Moria, si enda jadi erkiteken pernanden e mekatap kal nuri-nuri kerna kecibal jabuna, emaka lalap ipersingetina guna erpengendes man Dibata arah toto bage pe Kata Dibata. Erkiteken si e mesikel me ia guna ikut ras ku PA Moria. Sipeduaken, lit hobina mayet baju tupung la lit si nukur bas kedena. Erdandanken piga-piga temanna si usur ku kedena e, mindo segelah iajari bas mayet, piah dungna baju kebayana enggo ras ia mayetsa.

Lidia sekalak diberu Junani, tupung italangi Tuhan pusuhna, maka tutus kal atena megiken pengajaren Paulus. Iberekenna dirina rikut ras jabuna guna iperidiken. La terjeng si e, ipindokenna kal segelah Paulus ras teamna pe iundangna ku rumahna guna kesilang. Paksa si e ngaloken kalak si maba Berita Si Meriah kesilang ku rumah sada ancamen si mberat man alonken sabap per-Berita Si Meriah e bagepe perpulungen Kristen ianggap musuh negara (pemerintah). Kune tereteh maka ndatken ukumen bas negara nari, sabap agama Kristen e ianggap agama si labo ndukung pemerentah. Tapi e pe ilakokenna guna kiniulin Berita Si Meriah. Bas ulang tahun Moria enda iarapkan geluhta jadi pasu-pasu i bas kerina dampar. Benaken bas dahin-dahin si kitik nari, jadilah geluh si ernanam.